

## **NAFKAH ISTERI BEKERJA: ANTARA HUKUM DAN REALITI**

Fatimah binti Ali  
Kolej Islam Antarabangsa Sultan Ismail Petra, Nilam Puri, Kelantan  
Email: fatimahalipc@yahoo.com

### **Abstrak**

*Dalam dunia moden hari ini, lelaki yang mahu berumahtangga seringkali memilih bakal pasangan yang berkerja, agar mereka tidak terbeban dengan pembiayaan rumah tangga yang berat, apabila isteri dapat sama-sama menanggung nafkah keluarga. Ada juga suami yang memaksa isteri untuk bekerja setelah berkahwin dengan pelbagai cara walaupun menuduakan peranan membebaskan isteri. Ada juga suami yang bekerja sendiri memaksa isteri terlibat dengan tugas ekonominya, walaupun tugas domestik isteri yang sedia ada sudah tidak bertanggung. Ini terjadi kerana lelaki atau suami itu tidak sedar bahawa nafkah isteri adalah tanggungjawab suami. Ada yang sedar tugas tersebut tetapi mencari isteri yang berada atau berpendapatan sendiri kerana merasakan dia tidak mampu menanggung perbelanjaan rumahtangga sendirian. Hingga akhirnya ada yang terpaksa bertukar peranan. Kertaskerja ini akan berbincang mengenai pengertian nafkah dan hukum hakam nafkah isteri termasuk nafkah wajib dan nafkah sampingan, bukti pensyariatan nafkah daripada al-Qur'an dan Hadis, sebab wajib nafkah dan lain-lain. Ia turut membincangkan mengenai realiti pembiayaan rumah tangga dalam masyarakat moden*

### **1. Pendahuluan**

Rumahtangga adalah batu bata dalam pembinaan masyarakat. Jika rumahtangga bahagia dan harmoni, masyarakat akan menjadi aman dan tenteram. Untuk menjamin keharmonian rumahtangga, kombinasi tuntutan meterial dan kerohanian perlu dipenuhi.

Kehidupan dalam dunia yang serba canggih memerlukan perbelanjaan yang banyak. Lebih-lebih lagi jika mahu hidup ceria dan selesa, memiliki pelbagai alat bantu di rumah dan di luar rumah. Rumah tangga yang bersih, lapang dan selesa menjadikan hati lapang dan selesa untuk mengabdikan diri kepada Allah.

Oleh itu anak-anak muda yang ingin mendirikan rumah tangga biasanya memilih pasangan berada atau bekerja supaya mereka dapat tolong menolong dalam mengurus rumah tangga. Pasangan yang ingin berumah tangga juga perlu melengkapkan diri dengan ilmu-ilmu mengenai rumah tangga dan keluarga seperti tanggungjawab suami terhadap isteri, tanggungjawab isteri terhadap suami, tanggungjawab ibu bapa terhadap anak-anak serta tanggungjawab anak-anak terhadap ibu bapa dan hak-hak masing-masing.

Ini kerana hak dan tanggungjawab berjalan seiring. Jika ada tanggungjawab yang dilaksanakan maka ada hak yang boleh dituntut. Sebaliknya jika tanggungjawab tidak terlaksana maka tiada hak yang dapat dituntut. Kejahilan mengenai perkara ini biasanya menyebabkan tanggungjawab dan hak tidak terlaksana, seterusnya rumahtangga menjadi pincang. Hal ini menyebabkan kursus perkahwinan diwajibkan ke atas calon-calon yang ingin melangsungkan perkahwinan. Antara hak-hak ahli keluarga iaitu isteri dan anak-anak yang diwajibkan ke atas suami atau bapa ialah hak untuk mendapatkan nafkah.

Dalam realiti kehidupan ada ketua keluarga yang tidak sedar tanggungjawab menanggung nafkah keluarga.

## 2. Pengertian Nafkah

Nafkah dari segi bahasa bermaksud mengeluarkan dan membelanjakan iaitu tiap-tiap sesuatu yang dibelanjakan oleh seseorang kepada seorang yang lain.<sup>1</sup> Menurut istilah ahli fekah nafkah bererti belanja atau sara hidup yang dikeluarkan oleh seseorang kepada orang yang layak menerima pembiayaan daripadanya seperti isteri dan anak-anak yang di bawah tanggungannya. Memberi nafkah kepada isteri bermaksud memberi sesuatu yang diperlukan oleh isteri seperti makanan, pakaian, tempat tinggal, perkhidmatan pembantu rumah, perubatan dan seumpamanya walaupun isteri tersebut seorang yang berada dan berkemampuan.<sup>2</sup>

Nafkah isteri yang diwajibkan ke atas suami berdasarkan nas syarak hanya meliputi makanan, pakaian dan tempat tinggal. Walau bagaimanapun dalam perbincangan para ahli fekah (*fuqaha'*) nafkah bukanlah terhad kepada tiga perkara asas di atas. Termasuk juga dalam pengertian nafkah segala keperluan sampingan isteri yang lain seperti pembantu rumah, perkakas rumah, alat kebersihan dan rawatan kesihatan. Namun demikian *fuqaha'* tidak sependapat dalam menentukan kewajipan suami menyediakan nafkah sampingan tersebut.<sup>3</sup>

Keperluan-keperluan isteri perlu disediakan oleh suami selama mana perkahwinan berlangsung dan tidak berlaku sebab-sebab yang menggugurkan kewajipan tersebut. Nafkah yang dikeluarkan hendaklah dalam perkara yang diharuskan oleh syarak serta dapat diterima oleh adat kebiasaan sesuatu masyarakat. Ia hendaklah datang dari sumber yang halal dan hanya dikeluarkan untuk perkara-perkara yang memberi manfaat dan berfaedah sahaja.<sup>4</sup>

Nafkah boleh dibahagikan kepada beberapa jenis iaitu nafkah seseorang terhadap dirinya, nafkah *usul* terhadap *furu'*, nafkah *furu'* terhadap *usul* dan nafkah suami terhadap isteri.<sup>5</sup>

**(i) Nafkah Diri Sendiri:** Seseorang itu wajib menanggung nafkah diri sendiri jika dia mampu. Dia wajib menyediakan tempat tinggal, pakaian, makanan, minuman dan lain-lain untuk dirinya menggunakan hartanya sendiri selama mana dia mempunyai harta.

Al-Imam al-Bukhari<sup>6</sup> dan al-Imam Muslim<sup>7</sup>:

---

<sup>1</sup> Muhammad 'Uqlah (Dr.) (1992), *Nizam al-Ushrah fi al-Islam*. Amman: Maktabah al-Risalah al-Hadithah, h. 89.

<sup>2</sup> 'Umar 'Abd Allah (1963), *Ahkam al-Syari'ah al-Islamiyyah fi Ahwal al-Syakhsiyyah*, T.T.P.: Dar al-Ma'arif, h. 332.

<sup>3</sup> Wahbah al-Zuhaili, (1989), *al-Fiqh al-Islami wa Adillatuh*, j 7, Damsyiq: Dar al-Fikr, h. 798-808.

<sup>4</sup> Muhammad al-Syarbini (t.t.), *Mughni al-Muhtaj 'ala Ma'rifah Ma'ani Alfaz al-Minhaj*, Beirut, Dar al-Fikr, h. 425.

<sup>5</sup> Dr. Mustafa al-Khin dan Dr. Mustafa al-Bugha (1987), *al-Fiqh al-Manhaji*, Damsyiq, Matba'ah al-Sabah, juzu' 4, h. 169.

<sup>6</sup> Hadith no.6763, kitab al-ahkam bab bai' al-imam 'ala al-nas amwalihim wa diya'ihim.

<sup>7</sup> Hadith bernombr 997, kitab al-zakah, bab al-ibtida' fi al-nafaqah bi al-nafs.

عن جابر رضي الله عنه قال: أعتق رجل من بني عذرة عبدا له عن دبر، فلغ ذلك رسول الله صلى الله عليه وسلم فقال: ألك مال غيره؟ فقال: لا. فقال: من يشتريه مني؟ فاشتراه نعيم ابن عبد الله رضي الله عنه بثمانمائة درهم، فجاء بها رسول الله صلى الله عليه وسلم، فدفعها إليه، ثم قال " إبدأ بنفسك فتصدق عليها، فإن فضل شيء فأهلك، فإن فضل عن أهلك شيء فلذي قرابتك، فإن فضل عن ذي قرابتك شيء فهكذا وهكذا".

(ii) **Nafkah Usul Terhadap Furu'**: *Usul* bermaksud ayah, datuk dan ke atas yang wajib menanggung nafkah *furu'* iaitu anak atau cucunya dan ke bawah. Para ulama sependapat bahawa bapa atau ayah diwajibkan menanggung nafkah anak-anaknya sama ada lelaki atau perempuan. Jika bapa tidak ada maka ia menjadi tanggungjawab datuk sebelah bapa (bapa kepada bapa). Buktinya ialah firman Allah (al-Talaq ayat 6): (فإن أرضعن لكم فآتوهن أجورهن).

Syarat-syarat wajib nafkah *furu'* ke atas *usul*: (1) *Usul* atau bapa senang maksudnya mempunyai perbelanjaan yang lebih daripada keperluan diri dan isterinya dalam tempoh sehari semalam (2) *Furu'* atau anak itu fakir, sama ada dia fakir dan masih kecil atau fakir zaman (tidak mampu bekerja) atau fakir gila. Kalau dia sihat dan baligh maka nafkahnya tidak wajib ditanggung oleh bapanya.<sup>8</sup>

(iii) **Nafkah Furu' Terhadap Usul**: Nafkah bapa dan ibu serta datuk dan nenek wajib ke atas *furu'*. Buktinya ialah firman Allah (Luqman, ayat 15): (وصاحبهما في) (وقضى ربك ألا تعبدوا إلا إياه وبالوالدين إحسانا) (al-Isra' 23) dan (الدنيا معروفان) dan (فإن أرضعن لكم فآتوهن أجورهن) dan (فإن أرضعن لكم فآتوهن أجورهن) dan (فإن أرضعن لكم فآتوهن أجورهن) dan (فإن أرضعن لكم فآتوهن أجورهن).

Syarat-syarat wajib nafkah *usul* ke atas *furu'*: (1) *Furu'* atau anak senang maksudnya mempunyai perbelanjaan yang lebih daripada keperluan diri dan isterinya dalam tempoh sehari semalam (2) *Usul* atau bapa itu fakir. Maksud fakir di sini ialah dia tidak mampu menanggung keperluan darurinya sama ada dia mampu bekerja atau tidak (3) Bagi nafkah ibu wajib ke atas anaknya dalam dua keadaan iaitu bapanya tidak mampu menanggungnya atau bapanya telah meninggal dunia dan ibunya ketiadaan suami. Nafkah ibu tidak menjadi tanggungjawab anak jika ayah kepada anak tersebut mampu atau ibunya telah berkahwin dengan lelaki lain.<sup>9</sup>

### 3. Bukti Pensyariatan Nafkah

Nafkah isteri merupakan satu ketetapan yang diwajibkan ke atas suami berdasarkan al-Qur'an, hadis dan rasional. Bukti al-Qur'an ialah firman Allah:

<sup>8</sup> Dr. Mustafa al-Khin dan Dr. Mustafa al-Bugha (Op. Cit) h. 169-176.

<sup>9</sup> Ibid.

﴿ وَالْوَالِدَاتُ يُرْضِعْنَ أَوْلَادَهُنَّ حَوْلَيْنِ كَامِلَيْنِ لِمَنْ أَرَادَ أَنْ  
يُتِمَّ الرَّضَاعَةَ وَعَلَى الْمَوْلُودِ لَهُ رِزْقُهُنَّ وَكِسْوَتُهُنَّ بِالْمَعْرُوفِ  
لَا تُكَلَّفُ نَفْسٌ إِلَّا وُسْعَهَا

Ertinya: “Dan ibu-ibu hendaklah menyusukan anak-anak mereka selama dua tahun genap iaitu bagi orang yang hendak menyempurnakan penyusuan itu dan kewajiban bapa pula ialah memberi makan dan pakaian kepada ibu itu menurut cara yang sepatutnya”.

Terjemahan surah al-Baqarah (2): 233.

أَسْكِنُوهُنَّ مِنْ حَيْثُ سَكَنْتُمْ مِنْ وُجْدِكُمْ وَلَا تُضَارُوهُنَّ  
لِيُضَيِّقُوا عَلَيْهِنَّ

Ertinya: “Tempatkanlah (isteri-isteri yang menjalani iddahnya) di tempat kediaman kamu sesuai dengan kemampuan kamu. Dan janganlah kamu adakan sesuatu yang menyakiti mereka (di tempat tinggal itu)”.

Terjemahan surah al-Talaq(65): 6.

لِيُنْفِقَ ذُو سَعَةٍ مِّنْ سَعَتِهِ ۖ وَمَنْ قُدِرَ عَلَيْهِ رِزْقُهُ فَلْيُنْفِقْ مِمَّا  
ءَاتَاهُ اللَّهُ لَا يَكْلِفُ اللَّهُ نَفْسًا إِلَّا مَا ءَاتَاهَا سَيَجْعَلُ اللَّهُ بَعْدَ عُسْرٍ يُسْرًا

Ertinya: “Hendaklah orang yang mampu memberi nafkah menurut kemampuannya. Dan sesiapa yang disempitkan rezekinya maka hendaklah ia memberi nafkah dari apa yang diberikan Allah. Allah tidak memberati seseorang melainkan (sekadar kemampuan) yang diberikan Allah kepadanya. Orang-orang yang dalam kesempitan hendaklah ingat bahawa) Allah akan memberikan kesenangan sesudah berlakunya kesusahan”.

Terjemahan surah al-Talaq(65): 7.

Nas-nas al-Qur’an di atas menunjukkan kewajiban suami menanggung nafkah isteri meliputi makanan, pakaian dan tempat tinggal tanpa mengira kedudukan isteri sama ada kaya atau miskin. Ayat-ayat al-Qur’an di atas juga menjelaskan bahawa Allah tidak membebani suami menyediakan nafkah melainkan mengikut kemampuan dan rezeki yang dikurniakan Allah kepadanya.<sup>10</sup>

Bukti Hadis pula antaranya ialah:

<sup>10</sup> Al-Zuhaili, Wahbah (1989), *al-Fiqh al-Islami wa Adillatuh*, j 7, Damsyiq: Dar al-Fikr, h. 798-808.

عن عائشة رضي الله عنها قالت: دخلت هند بنت عتبة امرأة أبي سفيان على رسول الله صلى الله عليه وسلم فقالت: يا رسول الله إنَّ أبا سفيان رجل شحيح لا يعطيني من النفقة ما يكفيني ويكفي بنيَّ إلا ما أخذت من ماله بغير علمه فهل عليَّ من جناح؟ فقال رسول الله صلى الله عليه وسلم: خذي من ماله بالمعروف ما يكفيك ويكفي بنيك.<sup>11</sup>

Selain itu para ulama juga sependapat tentang kewajiban suami menyediakan nafkah isteri apabila mencukupi syarat-syarat mewajibkan nafkah dan tiada sebab menggugurkan kewajiban tersebut.<sup>12</sup> Daripada nas-nas al-Qur'an dan hadis di atas jelas menunjukkan kewajiban nafkah isteri ke atas suami dengan menyediakan segala keperluan isteri merangkumi makanan, pakaian dan tempat kediaman mengikut kebiasaan yang diamalkan oleh masyarakat setempat. Kadar nafkah pula tidak ditentukan melainkan secara makruf iaitu mengikut keperluan dan hajat isteri bergantung kepada keadaan kebiasaan dan adat sesuatu tempat.

Kewajiban suami memberi nafkah juga merupakan sesuatu yang rasional. Ini kerana di dalam kehidupan berumah tangga isteri menyerahkan diri sepenuhnya kepada suami untuk menunaikan kewajiban atau hak-hak suami ke atas dirinya. Ketaatan, pengorbanan dan curahan tenaga yang diberikan oleh isteri untuk kebaikan dan faedah suami dalam mengurus rumahtangga perlu diberi balasan. Oleh itu suami berkewajiban menyediakan keperluan isteri iaitu nafkahnya sebagai balasan ke atas penyerahan dan pengorbanan diri isteri untuk kemanfaatan suaminya selama mana perkahwinan di antara mereka berlangsung dan tidak berlaku faktor-faktor yang menggugurkan kewajiban tersebut.<sup>13</sup>

#### 4. Sebab Wajib Nafkah

Nenurut jumhur *fuqaha'* kewajiban nafkah isteri bukan semata-mata disebabkan akad perkahwinan yang sah tetapi juga disebabkan wujud keterikatan dan penyerahan diri isteri terhadap suaminya dengan sentiasa mentaati suami.<sup>14</sup>

Antara punca ketenangan suami ialah keberadaan isteri di sampingnya. Allah berfirman:

وَمِنْ آيَاتِهِ أَنْ خَلَقَ لَكُمْ مِنْ أَنْفُسِكُمْ أَزْوَاجًا لِتَسْكُنُوا إِلَيْهَا وَجَعَلَ  
بَيْنَكُمْ مَوَدَّةً وَرَحْمَةً إِنَّ فِي ذَلِكَ لَآيَاتٍ لِقَوْمٍ يَتَفَكَّرُونَ ﴿٢٠﴾

<sup>11</sup> Bukhari, Abu 'Abd Allah, Muhammad ibn Isma'il ibn Ibrahim ibn al-Mughirah al-Ja'fi al- (1987), *Sahih al-Bukhari*, Kitab al-Nafaqat, bab: Idha Lam Yunfiq al-Rajul.

<sup>12</sup> Ibn Qudamah, Abu Muhammad 'Abd Allah ibn Ahmad (1405 H.), *al-Mughni*, j. 8, Beirut: Dar al-Kitab al-'Arabi, h. 16.

<sup>13</sup> Suzara binti Makpol (2003), *Nafkah Isteri Bekerja: Suatu Analisis Hukum*, (Disertasi Sarjana), Jabatan Fiqh dan Usul, Akademi Pengajian Islam, Universiti Malaya, h. 24.

<sup>14</sup> Lihat Abu Bakr ibn Mas'ud (1982), *Bada'i' al-Sana'i' fi Tartib al-Syara'i'*, Beirut: Dar al-Kitab al-'Arabi, j 4, h. 18. Malik ibn Anas (t.t.), *al-Mudawwarah al-Kubra*, j. 2, Beirut: Dar al-Sadir, h. 254. 'Abd al-Fattah Muhammad Abu al-'Aynayn (t.t.), *al-Islam wa al-Usrah*, Qahirah: Maktabah al-'Alamiyyah, h. 409.

Ertinya: “Dan di antara tanda-tanda yang membuktikan kekuasaan-Nya dan rahmat-Nya, bahawa Ia menciptakan untuk kamu (wahai kaum lelaki) isteri-isteri dari jenis kamu sendiri, supaya kamu bersenang hati dan hidup mesra dengannya. Dan dijadikannya di antara kamu (suami isteri) perasaan kasih sayang dan belas kasihan. Sesungguhnya yang demikian itu mengandungi keterangan-keterangan (yang menimbulkan kesedaran) bagi orang yang berfikir”.

Terjemahan surah al-Rum (30): 21.

Tinjauan penulis sendiri mendapati kebanyakan isteri mengatakan sanggup berhenti kerja jika suami bertanggungjawab dan mampu menanggung nafkah keluarga. Ini mungkin kerana mereka dibekalkan dengan perasaan kasih sayang dan belas kasihan seperti yang disebut dalam ayat di atas. Hasrat ini memang sesuai dengan ajaran Islam di mana para sarjana Islam sependapat mengatakan jika pendapatan suami sudah mencukupi untuk membiayai perbelanjaan keluarga dan dia tidak membenarkan isteri keluar bekerja, maka isteri haram mengingkari larangan tersebut.<sup>151</sup>

Keberadaan isteri di samping suami memudahkannya melaksanakan tanggungjawab terhadap suami. Antara hak suami yang menjadi tanggungjawab isteri ialah mentaati suami atau menyerahkan diri kepada suami secara sempurna (*ihtibas kamil*) sama ada pada waktu siang atau malam. Sebagai balasan *ihtibas kamil* kepada suami, isteri berhak mendapat nafkah. Jadi nafkah merupakan hak isteri yang dipertanggungjawabkan ke atas suami. Penglibatan isteri dalam kerjaya di luar rumah boleh menjejaskan hak suami, terutama jika terlibat dalam pekerjaan yang boleh memberi kesan sampingan terhadap kesihatan dan keterampilannya.<sup>16</sup>

Ada juga di kalangan suami yang pada peringkat permulaan membenarkan isteri keluar bekerja, tidak berapa lama kemudian dia menarik balik keizinannya. Dalam hal ini jika isteri berdegil dan tidak mahu berhenti kerja, dia dianggap derhaka (*nusyuz*) dan tidak berhak mendapat nafkah dari suami menurut sebahagian ulama.<sup>17</sup> Jika suami telah membenarkan isterinya bekerja di luar rumah dalam tempoh yang agak lama selepas berkahwinpun, sebahagian ulama berpendapat, suami masih lagi berhak untuk meminta isterinya berhenti kerja. Tetapi sebahagian yang lain berpendapat dalam hal ini suami tidak lagi berhak untuk menghalang isterinya daripada terus bekerja dan isteri juga berhak untuk mendapat nafkah dari suami.<sup>18</sup>

Dalam memilih pekerjaan ada isteri yang terlibat dengan pekerjaan yang dilakukan di rumah sendiri seperti menjahit pakaian, menenun pakaian dan lain-lain. Dalam hal ini para ulama berpendapat, suami tidak boleh menghalang isteri daripada melakukan pekerjaan seperti itu. Isteri tidak dianggap *nusyuz* jika meneruskan pekerjaan tersebut. Dia juga berhak mendapat nafkah daripada suaminya. Ini kerana

<sup>15</sup> ‘Abd.al-Fattah ‘Amr, Dr. (1998), *al-Siyasah al-Syar’iyyah fi al-Ahwal al-Syakhsiyyah*, Jordan: Dar al-Nafa’is, h. 88.

<sup>16</sup> *Ibid.*

<sup>17</sup> Badran Abu al-‘Aynayn Badran (t.t.), *al-Fiqh al-Maqarin li Ahwal al-Syakhsiyyah bayn al-Madhahib al-Arba‘ah al-Sunniyyah wa al-Madhahib al-Ja‘fariyyah wa al-Qanun*, j. 1, Beirut: Dar al-Nahdah al-‘Arabiyyah, h. 241-242; ‘Abd al-Majid Mahmud Matlub (Dr) (1995), *al-Wajiz fi Ahkam al-Usrah al-Islamiyyah*, Jizah: Ma‘had al-Dirasat al-Islamiyyah, h. 172-173; Zaki al-Din Sya‘ban (1989), *Ahkam al-Syari‘ah li Ahwal al-Syakhsiyyah*, Jami‘ah Qar Yunus, h. 319.

<sup>18</sup> *Ibid.*

isteri tidak mengurangkan penyerahannya kepada suami dan dia tidak keluar rumah kerana pekerjaannya. Tetapi jika pekerjaan tersebut boleh mendatangkan kemudharatan dan menjejaskan keterampilan isteri maka suami berhak menghalang atau memberi tunjuk ajar (*ta'dib*).<sup>19</sup>

Di kalangan wanita ada yang bekerja sejak masih gadis lagi. Sambil bekerja ada yang menyambung pelajaran atau mengikuti pelbagai kursus sehingga mereka menjadi bertambah maju dalam kerjayanya. Wanita seperti ini mungkin terfikir untuk meletakkan syarat dalam akad nikah bagi membolehkan mereka terus terlibat dalam pekerjaan di luar rumah. Tetapi syarat seperti ini menurut Mazhab Hanafi tidak sah.<sup>20</sup> Akad nikah tidak terbatal dengan syarat demikian. Suami berhak menegah isteri dari melibatkan diri dalam pekerjaan. Jika isteri ingkar maka dia dianggap melakukan *nusyuz* dan tidak berhak mendapat nafkah dari suami. Dalam hal ini mazhab Syafi'i dan Hanafi sependapat bahawa isteri tidak berhak untuk keluar bekerja tanpa keizinan dan kerelaan suaminya.<sup>2</sup>

Tentang meletakkan syarat dalam akad, Mazhab Maliki berbeza pendapat. Menurut mazhab Maliki isteri boleh meletakkan syarat dia boleh meneruskan penglibatannya dalam pekerjaan di luar rumah walaupun selepas berkahwin, semasa akad perkahwinan berlangsung. Syarat tersebut sah menurut mazhab ini. Tetapi perbuatan tersebut dianggap makruh kerana ia boleh memberi kesan buruk terhadap suami dalam pergaulan mereka.<sup>21</sup>

Mazhab Syafi'i dan Hanbali sependapat dengan Mazhab Maliki dari segi sah syarat isteri semasa akad untuk terus bekerja selepas kahwin. Jika syarat tersebut dilafazkan semasa akad berlangsung, suami tidak berhak menghalang isteri untuk meneruskan pekerjaannya. Isteri berhak mendapat nafkah dari suami selama pekerjaan yang diceburi memenuhi kehendak kemaslahatan keluarga. Suami hanya berhak menghalang isteri jika pekerjaannya tidak memenuhi kehendak tersebut.<sup>22</sup>

Namun sarjana perundangan kontemporari seperti Dr 'Abd.al-Fattah 'Amr mempunyai pandangan berbeza dengan ulama terdahulu tentang pekerjaan wanita. Menurut 'Abd.al-Fattah terdapat pekerjaan yang memerlukan penglibatan wanita secara khusus seperti tenaga pengajar anak-anak perempuan dan pegawai perubatan sakit puan. Pekerjaan seperti ini dianggap memenuhi keperluan asasi (*daruri*) dan keperluan yang mendesak (*hajjah mulihhah*).<sup>23</sup>

Menurut sarjana perundangan kontemporari isteri yang melakukan pekerjaan seperti di atas tidak perlu mendapat keizinan suami terlebih dahulu. Dalam hal ini dia tidak dianggap melakukan *nusyuz* yang menghalangnya mendapat nafkah dari suami sekalipun pekerjaannya tidak direstui oleh suami. Ini kerana tidak ada nas secara jelas

---

<sup>19</sup> Badran Abu al-'Aynayn Badran (t.t.), *op. cit.*, h. 242.

<sup>20</sup> Ibn 'Abidin (t.t.), *Hasyiah al-Radd al-Mukhtar 'ala al-Dur al-Muhtar*, j.2, Qahirah: Matba'ah al-Halabi, h. 891.

<sup>21</sup> *Ibid*, h. 320.

<sup>22</sup> Ibn Qudamah, Abu Muhammad 'Abd Allah ibn Ahmad (1983), *al-Mughni wa Syarh al-Kabir*, j 8, Beirut: Dar al-Kutub al-'Ilmiyyah, h. 159; al-Syarbini, *Mughni al-Muhtaj*, j. 3, Beirut, Dar al-Fikr, h. 435.

<sup>23</sup> 'Abd.al-Fattah 'Amr, Dr. (1998), *op. cit.* h. 93.

yang menunjukkan isteri berhak atau tidak mendapat nafkah disebabkan penglibatannya dalam kerjaya.<sup>24</sup>

## 5. Realiti Hidup Masyarakat Islam

Dalam dunia moden hari ini, lelaki yang mahu berumahtangga seringkali memilih bakal pasangan yang berkerja, agar mereka tidak terbeban dengan pembiayaan rumah tangga yang berat, apabila isteri dapat sama-sama menanggung nafkah keluarga. Ada juga suami yang memaksa isteri untuk bekerja setelah berkahwin dengan pelbagai cara walaupun menduakan peranan membebaskan isteri. Ada juga suami yang bekerja sendiri memaksa isteri terlibat dengan tugas ekonominya, walaupun tugas domestik isteri yang sedia ada sudah tidak tertanggung. Ini terjadi kerana lelaki atau suami itu tidak sedar bahawa nafkah isteri adalah tanggungjawab suami. Ada yang sedar tugas tersebut tetapi mencari isteri yang berada atau berpendapatan sendiri kerana merasakan dia tidak mampu menanggung perbelanjaan rumahtangga, hingga akhirnya ada yang terpaksa bertukar peranan.

Jika berlaku perceraian banyak kes suami atau ayah lari daripada tugas membayar nafkah idah isteri atau nafkah anak. Di mahkamah banyak kes-kes tuntutan nafkah yang tertangguh disebabkan penanggng nafkah tidak hadirperbicaraan. Mampukah mereka lari dari menghadiri mahkamah Allah nanti?

## 6. Isteri Dan Suami Bertukar Peranan

Dari perbincangan mengenai syarat yang membolehkan wanita keluar bekerja dapat difahami bahawa pekerjaan isteri bukanlah bertujuan menanggung nafkah keluarga. Namun demikian pasangan yang berumah tangga ada kalanya isteri lebih produktif daripada suami dari segi ekonomi. Contohnya jika isteri mempunyai ijazah atau kelayakan yang lebih tinggi daripada suami. Hal ini mendorong mereka untuk bertukar peranan; suami mengurus rumah dan isteri mencari nafkah.

Fenomena lelaki meninggalkan kerjaya dan menjadi 'suri rumah' manakala isteri keluar bekerja serta menyara keluarga, semakin diterima di kalangan masyarakat khususnya di bandar-bandar besar di negara ini. Menteri Pembangunan Wanita, Keluarga dan Masyarakat Datuk Seri Shahrizat Abdul Jalil berkata, kementeriannya menyedari fenomena tersebut tetapi yang paling mustahak ialah setiap pasangan membuat pilihan sendiri untuk menjalani kehidupan sedemikian. Katanya, kementeriannya tidak mempunyai statistik mengenai trend tersebut tetapi melalui pemerhatian beliau sendiri, fenomena yang jarang berlaku pada masa dahulu, kini sudah semakin menular dalam masyarakat Malaysia.<sup>25</sup>

Bagaimanapun dalam Utusan Malaysia 15 Mei 2006 Shahrizat berkata, isu suami menjadi suri rumah manakala isteri keluar mencari rezeki bukanlah budaya kaum lelaki negara ini. Suami menjadi suri rumah adalah kes terpencil malah kaum lelaki di Malaysia masih mengutamakan peranan sebagai imam di rumah dan bertanggungjawab mencari nafkah untuk keluarga.

---

<sup>24</sup> *Ibid.*

<sup>25</sup> *Utusan Malaysia*, "Lelaki Menjadi Suri Rumah Mula Diterima", 13 Mei 2006, h. 5.



Shahrizat berkata sebagai seorang menteri yang membela nasib golongan wanita, seelok-eloknya suami keluar bekerja mencari rezeki untuk isteri dan anak-anak. Tanggungjawab seorang lelaki selain menjadi pelindung dan rakan kongsi seorang wanita ialah dia juga harus mencari nafkah untuk keluarga melainkan dia sakit dan tidak berupaya bekerja. Tidak ada sebab untuk lelaki tidak bekerja kecuali malas. Ia adalah sesuatu yang memalukan. Kebanyakan lelaki yang menjaga anak-anak, menurut pendapat Shahrizat, itu adalah pilihan terakhir. Menurutnya lagi, di Malaysia sebab utama mendesak lelaki memilih menjadi suri rumah ialah kerana mereka jatuh sakit sehingga tidak berupaya bekerja. Perkara kedua ialah isteri mempunyai pendapatan yang lebih tinggi daripada suami.<sup>26</sup>

Bagaimanapun kata beliau kementerian akan menyerahkan kepada Jawatankuasa Fatwa Kebangsaan untuk memutuskan sama ada fenomena tersebut bercanggah dari segi hukum syarak kerana ia berkaitan dengan agama. Ketua Pengarah Jabatan Kemajuan Islam Malaysia (JAKIM) yang juga merupakan Setiausaha Jawatankuasa Muzakarah Fatwa Kebangsaan Datuk Mustafa Abdul Rahman berkata, dari segi hukum syarak tidak salah jika suami mengurus rumah tangga. Tetapi peranan itu perlulah bersifat sementara kerana tanggungjawab hakiki seorang suami untuk mencari nafkah keluarga. Dalam Islam tidak salah suami mengurus rumahtangga ketika isteri keluar bekerja. Begitu juga ketika suami tidak ada pekerjaan. Tetapi peranan itu hanya bersifat sementara sehingga dia mendapat pekerjaan. Islam dengan jelas telah menggariskan peranan suami dan juga isteri, justeru itu fenomena suami menjadi suri rumah, manakala isteri keluar mencari rezeki tidak timbul.<sup>27</sup>

Persoalan di atas disentuh oleh Mufti Johor, Datuk Noh Gadut. Beliau menyifatkan fenomena suami menjadi suri rumah, manakala isteri mencari nafkah sebagai fenomena songsang yang wajar dihentikan kerana ia jelas melanggar hukum syarak. Menurut Noh keadaan itu jika berterusan boleh menyebabkan sesuatu perkahwinan tidak beroleh keberkatan. Menurutnya tanggungjawab suami sebagai pemimpin dan pencari nafkah keluarga jelas dinyatakan dalam al-Qur'an Surah al-Baqarah, ayat 233. Bagaimanapun katanya jika perkara ini dalam keadaan darurat seperti suami berpenyakit, ia perlu diredai oleh isteri serta disertai tolak ansur. Beliau berkata:

“Islam memandang serius fenomena lelaki menjadi pengurus rumah tangga kerana ia didapati lari daripada fungsi sebenar suami. Tindakan ini tidak tepat kerana menyempang jauh daripada hukum Islam yang akhirnya dikhuatiri menyebabkan rumah tangga tidak tenteram”.<sup>28</sup>

---

<sup>26</sup> *Utusan Malaysia*, “Suami Menjadi Suri Rumah Kes Terpencil”, 15 Mei 2006, h. 1 dan 2.

<sup>27</sup> *Ibid.*

<sup>28</sup> *Utusan Malaysia*, “Suami Suri Rumah: Jawatankuasa Fatwa Bincang Jun”, 12 Mei 2006, h. 2.

## **7. Kesimpulan:**

Nafkah isteri, walaupun yang bekerja adalah tanggungjawab suami. Ini kerana isteri tidak dibolehkan keluar bekerja tanpa izin suami dan isteri menyerahkan dirinya kepada suami. Sepatutnya suami ayah menerima tugas yang diletakkan ke atas bahu mereka dengan senang hati sebagai satu bentuk pengabdian diri kepada Allah, kerana itu adalah hukum. Isteri yang sanggup keluar bekerja untuk membantu suami dalam menanggung nafkah keluarga harus membetulkan niat mereka.